

## PRIJEDLOG

Na osnovu člana 8. stav 2. alineja 29. Zakona o principima lokalne samouprave („Službene novine Federacije BiH“, broj : 49/06 i 51/09), a u vezi Zakona o zaštiti i dobrobiti životinja BiH („Službeni glasnik BiH“ broj: 25/09), Zakona o zaštiti okoliša FBiH („Službene novine FBiH“, broj: 33/03 i 38/09), Zakona o veterinarstvu FBiH („Sl. novine FBiH“ broj: 46/00), Zakona o veterinarstvu BiH („Sl. glasnik BiH“ broj: 34/02), Zakona o javnom redu i miru USK-a („Sl. glasnik USK-a“ broj:15/10), člana 4 i 12 Zakona o prekršajima („Sl. novine FBiH“, broj:63/14) i člana 23.Statuta općine Ključ - Prečišćeni tekst (Službeni glasnik općine Ključ, br. 3/10 i 3/11), Općinsko vijeće općine Ključ na \_\_\_\_\_ redovnoj sjednici održanoj dana \_\_\_\_\_ 2018. godine, donijelo je:

### **ODLUKU o držanju i zaštiti domaćih životinja, kućnih ljubimaca i nezbrinutih životinja na području općine Ključ**

#### **I – OPĆE ODREDBE**

##### **Član 1.**

(1) Ovom Odlukom se propisuju uslovi, način držanja i postupanja sa kućnim ljubimcima i nezbrinutim životinjama, a naročito kretanje pasa u javnim objektima i na javnim površinama, način postupanja sa izgubljenim i napuštenim životinjama, psima i mačkama lutalicama i životinjama opasnim za okolinu na području općine Ključ, nadzor i kaznene odredbe.

(2) Ova Odluka se ne primjenjuje na službene pse koji u obavljanju svojih poslova koriste tijela državne uprave i druge pravne osobe (npr. policija, zaštitari, granična služba) kao i na pse osposobljene za pomoć osobama sa posebnim potrebama (npr. vodiče slijepih osoba) te lovačke pse i pse tartufare samo za vrijeme lova.

(3) Držanje i kretanje lovačkih pasa za vrijeme lova izvan naselja utvrđen je Zakonom o lovstvu, propisima proizašlim iz naprijed navedenog Zakona i drugim pozitivnim zakonskim propisima.

##### **Član 2.**

U ovoj Odluci u upotrebi su pojmovi sa sljedećim značenjem:

1. **Vlasnik/držalac životinje** - svako pravno ili fizičko lice koje je kao vlasnik, korisnik ili čuvar neposredno odgovorno za zdravlje i dobrobit životinje.
2. **Eutanazija** - bezbolno usmrćivanje životinja.
3. **Higijeničarska služba** - služba koja stalno i sigurno obavlja uklanjanje životinja, pasa lualica, lešina životinja, određenih nejestivih nusproizvoda klanja, konfiskata i valioničkih otpadaka.
4. **Izgubljena životinja** - ona životinja koja je napustila vlasnika/držaoca bez njegove volje.
5. **Napuštena životinja** - kućna životinja koju je vlasnik/držalac svjesno napustio.
6. **Psi i mačke lualice** - su neregistrirane i neoznačene životinje o kojima se niko ne brine i koje bez nadzora lutaju ulicama i drugim javnim površinama.
7. **Skloništa za životinje** - prostori u kojima se smještaju pronađene (napuštene i izgubljene) životinje na daljnju brigu i moguće udomljavanje.

##### **Član 3.**

(1) Domaćim životinjama u smislu ove Odluke smatraju se:

- kopitari,
- papkari,
- perad

(2) Kućnim ljubimcima u smislu ove Odluke smatraju se:

- psi,
- domaće mačke,
- domaće ptice, mali glodari,
- terarijske, akvarijske i druge životinje koje se drže za društvo, rekreaciju, zaštitu ili pomoć čovjeku.

(3) Držanje opasnih životinja kao kućnih ljubimaca regulisano je Pravilnikom o držanju opasnih životinja.“

#### **Član 4.**

(1) Držalac životinje u smislu ove Odluke ne može biti lice mlađe od 18 godina.

(2) Imalac životinje, zavisno od vrste, pasmine, starosti i fizioloških potreba, dužan je životinju:

- a) hraniti i napajati prema njenim fiziološkim potrebama;
- b) njegovati i osigurati joj zdravstvenu zaštitu;
- c) smjestiti je u dovoljno prostora i osigurati joj odgovarajuće uslove za kretanje, ako je privezana ili zatvorena;
- d) osigurati životinjama koje se drže u zatvorenim prostorima dovoljno svjetlosti, toplote, vlage, provjetranje, higijenu prostora;
- e) osigurati takav sistem nadzora nad životinjama koje se drže u zatvorenim prostorima da u slučaju nesreće imalac životinja može reagirati na propisan način;
- f) ne izlagati životinju ekstremnoj toploti ili hladnoći;
- g) osigurati životinji dovoljno kretanja.

(3) Vlasnici/držaoci životinja dužni su brinuti se o njihovom zdravlju, ishrani, smještaju, higijeni i prema njima postupati u skladu sa Zakonom o zaštiti i dobrobiti životinja, Zakonom veterinarstvu BiH, Zakonom veterinarstvu FBiH, Zakonom o zaštiti okoliša, Zakonom o javnom redu i miru USK-a, Odlukom o javnom redu i miru općine Ključ, Odluke o komunalnom redu općine Ključ te odredbama ove Odluke.

## **II – USLOVI ZA DRŽANJE DOMAĆIH ŽIVOTINJA**

#### **Član 5.**

(1) Na užem urbanom području općine Ključ zabranjeno je uzgajanje i držanje domaćih životinja (papkara, kopitara, pernate živine i slično), zvijeri i pčela.

(2) Dozvoljava se držanje peradi u domaćinstvima na području općine, uz odgovarajuće sanitarno-higijenske uslove prostora u kojem boravi u skladu sa Odlukom o komunalnom redu općine Ključ.

#### **Član 6.**

(1) Na ostalim područjima grada i naselja na području Općine uzgajanje i držanje životinja dozvoljeno je pod uslovima da je:

1. objekat za smještaj domaćih životinja izgrađen od čvrstog materijala,
2. propisno izgrađen vodonepropusni objekat za sakupljanje stajskog gnojiva sa otočnom jamom,
3. objekat za držanje domaćih životinja i objekat za sakupljanje stajskog gnojiva udaljen od susjednih stambeno-poslovnih objekata, javnih puteva i drugih prolaza najmanje 10 metara, a od objekata za snabdjevanje sa vodom za piće (bunari, bazeni, izvorišta, javne česme i slično) najmanje 20 metara,
4. otpadna voda (oseka i slično) sprovedena u kanalizacionu mrežu ili otočnu jamu sa betonskim poklopcem.

(2) Dozvoljava se uzgajanje i držanje kopitara i papkara na užem području grada, uz odgovarajuće sanitarno – higijenske uslove prostora u kojem borave u skladu sa Odlukom o komunalnom redu općine Ključ.

### **III – USLOVI I NAČIN DRŽANJA KUĆNIH LJUBIMACA**

#### **Član 7.**

(1) Držanje kućnih ljubimaca na području općine se dozvoljava uz obezbjeđenje osnovnih sanitarno – higijenskih uslova i na način da se ne remeti javni red i mir.

(2) Držanje kućnih ljubimaca uz uslove iz stava 1. ovog člana u zajedničkim stambenim zgradama, odnosno zajedničkim prostorima unutar i van zgrade dozvoljeno je uz suglasnost svih suvlasnika ( vlasnika pojedinih stambeno – poslovnih prostora ) i na način da se ne remeti kućni red u zgradi.

#### **Član 8.**

(1) U gradskom području i na gušće naseljenim mjestima na području općine zabranjuje se držanje većeg broja pasa ( tri i više ).

(2) U porodičnoj kući ili dvorištu porodične kuće dozvoljeno je držati pse i mačke na način da ne ometaju red i mir građana.

(3) Pas koji se drži u neograđenom dvorištu mora biti vezan lancem na način da ne ometa kretanje i sigurnost građana ili mora biti smješten u boks koji će spriječiti nekontrolisano kretanje psa.

(4) Držalac ne smije vezati psa na lanac koji je kraći od 3 ( tri ) metra ili trostruke dužine životinje, mjereno od vrha repa do vrha njuške.

(5) Ukoliko se pas drži u ograđenom prostoru za psa ili kućici za psa, smještaj kućice ili ograđenog prostora mora biti takav da ne ometa stanovanje u susjednom dvorištu.

(6) Pas koji se drži u ograđenom dvorištu ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, a na ulaznim dvorišnim vratima mora biti na vidnom mjestu ispisana oznaka koja upozorava na psa.

(7) Ukoliko pas iz bilo kojih razloga pobjegne ili nestane sa mjesta držanja vlasnik psa je dužan u roku od 48 sati prijaviti slučaj Službi za civilnu zaštitu i zaštitu od požara općine Ključ i JP “Veterinarska stanica” doo Ključ.

(8) Vlasnik/držalac, čiji pas učestalim i dugotrajnim lajanjem ili zavijanjem remeti mir, dužan je odmah poduzeti odgovarajuće mjere kako bi spriječio daljnje uznemiravanje, ili je dužan ukloniti psa.

(9) Pas, mačka i drugi kućni ljubimci moraju se držati tako da ne ugrožavaju osobnu sigurnost građana.

(10) Vlasnik/držalac kućnog ljubimca koji se o njemu ne može brinuti, dužan je postupati u skladu sa Zakonom kojim se uređuje oblast zaštite i dobrobiti životinja.

(11) Zabranjeno je fizičkim i pravnim licima ometanje službenih osoba pri obavljanju poslova i zadataka utvrđenih ovom Odlukom, kao i lažno predstavljanje lica za vlasnika/držaoca psa.

(12) Zabranjeno je dovođenje i napuštanje kućnih ljubimaca, posebno pasa i mačaka, na područje općine Ključ sa područja drugih općina i gradova.

#### **Član 9.**

Držaoci opasnih pasa (psi koji prema svojim prirodnim/urođenim sklonostima mogu ispoljavati agresivnost) dužni su iste držati u skladu sa Pravilnikom o držanju opasnih životinja ( Sl. glasnik BiH, broj: 27/10).

## **IV- NAČIN KONTROLE RAZMNOŽAVANJA**

### **Član 10.**

- (1) Držaoci životinja moraju osigurati kontrolu razmnožavanja životinja pod njihovim nadzorom, a za sve potomke svojih životinja snose odgovornost, te iste trebaju u roku od 15 dana registrirati u Službi za civilnu zaštitu i zaštitu od požara općine Ključ i JP "Veterinarska stanica" Ključ.
- (2) Držaoci pasa i mačaka moraju spriječiti nekontrolisano razmnožavanje svojih ljubimaca.
- (3) Način kontrole razmnožavanja pasa i mačaka mogu biti: - preventivno djelovanje (kastracija ili sterilizacija), - kontrola kretanja ženki u vrijeme tjeranja, - upotreba veterinarskih sredstava,
- (4) Poslove preventivnog djelovanja i upotrebe veterinarskih sredstava iz stava 3. ovog člana obavlja registrirana ovlaštene nadležne veterinarske organizacije

## **V – KRETANJE PASA NA JAVNIM POVRŠINAMA I OBJEKTIMA JAVNE NAMJENE**

### **Član 11.**

- (1) Držaoci pasa mogu psa izvesti van zatvorenog prostora samo na kratkom povodniku dužine do 3 metra.
- (2) Opasni psi moraju se voditi na uzici i sa zaštitnom korpom na njušci.
- (3) Zabranjeno je pse dovoditi u objekte javne namjene: trgovine, ugostiteljske objekte, banke, tržnice, vozila javnog prevoza, organe uprave, institucije, javna preduzeća i ustanove, dječija igrališta, kupališta, sportske terene, groblja, javne skupove, škole, dječija obdaništa, bolnice, domove zdravlja, mesnice, vjerske objekte i slično.
- (4) O dozvoli ili zabrani uvođenja psa u hotele, apartmane i druge smještajne i ugostiteljske kapacitete odlučuje vlasnik i to označava postavljanjem naljepnice sa likom psa, odnosno s prekrštenim likom psa na ulazna vrata u objekat.

### **Član 12.**

Ograničenje kretanja pasa ne primjenjuje se na:

- pse koji imaju licence za rad i službe za obavljanje poslova pojedinih državnih, federalnih i kantonalnih organa sigurnosti i
- pse osposobljene za pomoć osobama sa posebnim potrebama.

### **Član 13.**

- (1) Držalac psa ili mačke dužan je očistiti svaku površinu koju je zaprljala njegova životinja na bilo koji način.
- (2) Ako pas ili mačka ošteti nečiju imovinu, držalac životinje je dužan izvršiti popravku ili nadoknaditi materijalnu štetu oštećenom fizičkom ili pravnom licu.

### **Član 14.**

Držalac kućnog ljubimca koji se o njemu ne može brinuti dužan je pronaći udomitelja/hranitelja, odnosno udruženje građana ili osobu koja će o njemu brinuti na propisan način ili ga predati skloništu za životinje kada se osnuje u skladu sa zakonom, te snositi troškove boravka do udomljenja ili drugog načina zbrinjavanja životinje.

## **VI – NAČIN POSTUPANJA SA IZGUBLJENIM I NAPUŠTENIM ŽIVOTINJAMA, PSIMA I MAČKAMA LUTALICAMA**

### **Član 15.**

(1) Vlasnik/držalac izgubljene životinje dužan je izgubljenu životinju prijaviti JP "Veterinarska stanica" doo Ključ najkasnije u roku od 48 sati.

(2) Psi i mačke lualice u smislu ove Odluke su neregistrirane/registrirane i neoznačene/označene životinje o kojima se niko ne brine i koje bez nadzora lutaju ulicama i drugim javnim površinama.

(3) Sakupljanje, prevoženje i smještaj napuštenih i izgubljenih životinja osiguravaju zaposleni u higijeničarskoj službi, skloništu za životinje kojeg u skladu sa Zakonom o zaštiti i dobrobiti životinja BiH ("Službeni glasnik BiH" broj: 25/09) osniva općina Ključ.

(4) Do momenta formiranja higijenskog servisa/skloništa za životinje ove poslove će obavljati uposlenici JKP "RAD" d.o.o. Ključ u saradnji sa uposlenicima JP "Veterinarska stanica" doo Ključ u skladu sa Zakonom o zaštiti i dobrobiti životinja, Zakonom o veterinarstvu, Zakonom o komunalnim djelatnostima i Odlukom o komunalnom redu općine Ključ

### **Član 16.**

Do osnivanja skloništa za životinje iz člana 15. ove Odluke, od tijela predviđenih Zakonom o zaštiti i dobrobiti životinja, JKP "RAD" d.o.o. Ključ, u saradnji sa JP "Veterinarska stanica" doo Ključ, će provoditi kastraciju, sterilizaciju i obilježavanje napuštenih životinja, naročito pasa lualica, te vršiti njihovo ponovno puštanje na mjesta prirodnog staništa, a s ciljem stabilizacije populacije napuštenih životinja kontrolom njihove reprodukcije u kratkom roku.

### **Član 17.**

Skloništa i higijenski servisi finansiraju se iz:

- a) budžeta entiteta, kantona, gradova i općina;
- b) drugih vidova finansiranja (donacije, pokloni itd.).

### **Član 18.**

(1) Vlasnik/držalac napuštene i izgubljene životinje je dužan nadoknaditi svaku vrstu štete, kao i skupljanja, prevoženja i smještanja u sklonište za životinje koju počinu životinja od trenutka nestanka ili napuštanja do trenutka njezina vraćanja vlasniku/držaoocu.

(2) U sklonište za životinje se smještaju životinje u skladu sa Zakonom o veterinarstvu FBiH („Službene novine FBiH“, broj 46/00), Zakonom o veterinarstvu BiH („Službeni glasnik BiH“, broj 34/02), i Zakonom o zaštiti i dobrobiti životinja BiH („Službeni glasnik BiH“, broj 25/09), i to:

- izgubljene životinje do vraćanja vlasniku/držaoocu,
- napuštene životinje kojima se ne može utvrditi vlasnik/držalac u roku od 15 dana od dana smještanja u sklonište za životinje i
- životinje kojima vlasnik/držalac ne može osigurati uslove držanja u skladu sa njihovim potrebama na neograničeno vrijeme.

(3) Troškove hvatanja, transporta i smještaja životinja, iz stava 1. alineja 1. ovog člana, snosi vlasnik/držalac životinje, a troškovi smještaja životinja, iz stava 1. alineja 2. ovog člana, podmiruju se iz budžeta Općine, osim ako se vlasnik/držalac naknadno ne utvrdi.

(4) Visinu naknade za smještaj životinja u sklonište za životinje koje snosi vlasnik/držalac životinje utvrđuje sklonište za životinje, dok troškove hvatanja i transporta do skloništa za životinje utvrđuje Općinsko vijeće posebnom odlukom.

(5) Sakupljanje pasa i mačaka mora se obavljati na najprikladniji način u skladu sa važećim zakonskim propisima.

(6) Izgubljene i napuštene životinje će biti vraćene držaocima uz naplatu troškova njihovog pronalaska i vraćanja držaocu.

#### **Član 19.**

Zabranjeno je životinju bez opravdanog razloga ubiti, nanositi joj bol, patnju i štetu, mučiti je i namjerno izlagati stresu i strahu

#### **Član 20.**

(1) Sklanjanje izgubljenih životinja-pasa lualica provešće se odmah kada za to postoje opravdani razlozi, a oni su:

- kada se pas ili psi nađu bez vlasnika na javnim površinama, školskim dvorištima, autobuskim stanicama, mostovima, raskršćima, parkovima, saobraćajnicama, sportskim i dječijim igralištima, zajedničkim dvorištima i drugim mjestima;
- kada komunalni redar odnosno komunalni inspektor ocijeni na temelju zapažanja da se radi o psu ili psima lualicama, jednom ili više na pomenutim mjestima iz alineje 1.ovoga člana.
- kada to utvrdi komunalni redar ili komunalni inspektor po službenoj dužnosti

(2) Komunalni inspektor ili redar ima pravo i obavezu pozvati higijeničarsku službu, a do formiranja iste uposlena tehnička lica koji obavljaju te poslove iz JKP "RAD" d.o.o. Ključ i JP "Veterinarska stanica" Ključ, a ovi su dužni odmah izvršiti usmeni nalog inspektora-redara o čemu se naknadno sačinjava zapisnik.

(3) Higijeničarska služba odnosno ovlašteni uposlenici JKP "RAD" d.o.o. Ključ i JP "Veterinarska stanica" Ključ zadržava pravo postupati sa psima lualicama u roku od 24 sata u skladu sa standardima iz člana 14. Zakona o zaštiti životinja BiH i članovima 15., 16. i 22. ove Odluke.

(4) Uklanjanje uginulih životinja na području općine Ključ vrši higijeničarsku službu, a do formiranja iste uposlena tehnička lica koji obavljaju te poslove iz JKP "RAD" d.o.o. Ključ i JP "Veterinarska stanica" Ključ, i isti su dužni odmah postupiti po prijavi komunalnog redara ili inspektora, te izvršiti usmeni nalog inspektora-redara o čemu se naknadno sačinjava zapisnik.

#### **Član 21.**

Usmrćivanje životinja može se provesti ako:

- a) je usmrćivanje životinje kičmenjaka potrebno radi održavanja prirodne ravnoteže u lovištu, u skladu sa Zakonom o lovstvu ("Sl. novine Federacije BiH", br. 4/06)
- b) se odvija u okviru mjera za uništavanje štetočina, a na drugi način se ne može spriječiti, onda se usmrćivanje smije izvršiti samo ako to neće uzrokovati više od nužnih bolova.

#### **Član 22.**

(1) Eutanazija životinja može se provesti ako:

- a) se životinja ne može izliječiti, a ostanak u životu će joj uzrokovati nepotrebne bolove i patnju; b) je životinja dostigla visoku starost i otkazuju joj osnovne životne funkcije;
- b) životinja boluje od neizlječive i/ili zarazne bolesti, posebno one koja može ugroziti ljude;
- c) je životinja opasna za okolinu;
- d) je životinja u agoniji.

(2) Za slučajeve iz stava (1) tačka a) i b) ovog člana, o usmrćivanju odlučuje imalac životinje, po preporuci veterinaru, a za slučajeve iz stava (1) tačka c), d) i e) ovog člana odlučuje veterinar Životinju može usmrtiti

lice osposobljeno za te poslove - doktor veterinarske medicine. Usmrćivanje se vrši na način koji će životinji osigurati brzu smrt, bez patnje koja se može izbjeći.

(3) Uništavanje glodara (deratizaciju) obavljaju za te poslove registrirane i osposobljene veterinarske organizacije, na način koji će kod životinja uzrokovati što manje bola i mučenja.

(4) Usmrćivanje životinja koje je u suprotnosti s ovim članom smatrat će se mučenjem životinja.

## **VII – REGISTRACIJA PASA**

### **Član 23.**

(1) Upisivanje pasa u registar i čipovanje je obavezno za sve vlasnike/držaoce pasa na prostoru općine Ključ.

(2) Za vođenje registra pasa i izdavanje službene isprave/dokumenta nadležna je Služba za civilnu zaštitu i zaštitu od požara.

(3) Vlasnici/držaoци registraciju svojih životinja vrše u Službi za civilnu zaštitu i zaštitu od požara, u roku od 8 dana od dana nabavke, te su iste dužni trajno označiti pomoću mikročipa i okovratnika u skladu sa odredbama Zakona o zaštiti i dobrobiti životinja i veterinarstvu.

(4) Vlasnik/držalac zatečenih postojećih životinja obavezan je izvršiti registraciju u roku od 30 dana od dana stupanja na snagu ove Odluke.

(5) Takse za registraciju i izdavanja službenih isprava/dokumentacije pasa naplaćuje se u iznosu od 10,00 KM na račun budžeta općine Ključ.

(6) Svaki pas mora biti označen na propisani način, u skladu sa ovom Odlukom i drugim pozitivnim zakonskim propisima, a vlasnik/držalac mora imati propisanu službenu ispravu/dokument o upisu (registraciji i čipovanju), vakcinaciji protiv bjesnila i obavljenom tretmanu protiv parazita.

(7) Za čipovanje, vakcinaciju protiv bjesnila i tretman protiv parazita pasa nadležna je registrirana veterinarska organizacija.

(8) Za troškove obaveznog označavanja-čipovanja pasa, vakcinacije pasa protiv bjesnila, tretmana protiv parazita i izdavanja službenih isprava/dokumentacije plaća se naknada u skladu sa Zakonom o veterinarstvu FBiH i Cjenovnikom minimalnih i maksimalnih cijena veterinarskih usluga na teritoriji Federacije Bosne i Hercegovine.

(9) Registar pasa sadrži: podaci o vlasniku/držaoцу psa: redni broj, ime, ime oca, prezime, adresa stanovanja i datum rođenja, vlasnika/držaoца psa, podaci o psu: vrsta i spol psa, datum registracije, datum označavanja i datum vakcionisanja protiv bjesnila i datum tretiranja protiv parazita, naziv veterinarske ustanove kod koje je izvršeno označavanja, vakcionisanja protiv bjesnila i tretiranja protiv parazita i napomena.

(10) Po izvršenom upisu u Registar pasa, Služba za civilnu zaštitu i zaštitu od požara vlasniku/držaoцу pasa izdaje potvrdu o registraciji psa.“

### **Član 24.**

(1) Svi psi stariji od tri mjeseca podliježu obaveznoj registraciji i cijepljenju protiv bjesnoće.

(2) Registraciju cijepljenja pasa vrše nadležne veterinarske organizacije za područje općine Ključ.

- (3) Imalac ili vlasnik psa je dužan označiti psa sa markicom koju je dobio prilikom registracije.
- (4) Imalac ili vlasnik životinje čiji pas je dostigao starost od tri mjeseca, odnosno koji je nabavio ili prodao psa, dužan je o tome u roku od 15 dana obavijestiti i JP "Veterinarska stanica" Ključ koja vodi upisnik (registar) pasa.
- (5) Imalac ili vlasnik psa dužan je JP "Veterinarska stanica" Ključ koja vodi upisnik (registar) pasa prijaviti uginuće psa radi utvrđivanja uzroka uginuća i ažuriranje baze podataka o registraciji i životinja.
- (6) Higijenskom servisu imalac ili vlasnik psa dužan je prijaviti gubitak ili bijeg psa u roku od 3 (tri) dana od dana gubitka ili bijega psa, uz dostavu vlasničke knjižice izdate od strane ovlaštene nadležne veterinarske organizacije.
- (7) Imalac ili vlasnik psa koji iz bilo kojeg razloga nije u mogućnosti nastaviti brigu o psu istog treba predati Higijenskom servisu radi daljeg zbrinjavanja.

## VIII - NADZOR

### Član 25.

- (1) Komunalni inspektor i komunalni redar općine Ključ vrše nadzor nad provođenjem odredbi članova ove Odluke: 3., 4., 5., 6., 7., 8., 9., 11., 15., 20. i 23.
- (2) U vršenju nadzora nad primjenom ove Odluke, inspektor je ovlašten da:
- rješenjem naredi otklanjanje utvrđenih nedostataka, na način i u roku određenom Zakonom,
  - rješenjem zabrani poduzimanje radnji koje su u suprotnosti s ovom Odlukom,
  - izrekne novčanu kaznu u skladu sa Zakonom ili pokrene prekršajni postupak,
  - donese zaključak o izvršenju rješenja putem druge osobe, uz prethodnu pismenu opomenu za izvršnike koji ne izvrše uopće ili ne izvrše u cjelosti radnje naložene rješenjem,
  - na osnovu zaključka iz alineje 4. ovog stava, putem druge osobe, oduzme domaće životinje i/ili kućne ljubimce.
- (3) Žalba protiv rješenja komunalnog inspektora ne odlaže izvršenje rješenja.
- (4) Žalbu protiv upravnog akta komunalnog inspektora rješava Komisija za ljudska prava i izbjeglice Općinskog vijeća općine Ključ.
- (5) Pravna i fizička lica dužna su komunalnom inspektoru i komunalnom redaru omogućiti nesmetano obavljanje inspeksijskog nadzora, a posebno pristup do prostorija, objekata i zemljišta gdje se drže domaće životinje i kućni ljubimci, te dati lične podatke i pružiti sva dodatna objašnjenja i dokumentaciju potrebnu za vođenje inspeksijskog pregleda.
- (6) JP "Veterinarska stanica" Ključ u skladu sa svojim ovlaštenjima vrši nadzor u slučajevima kršenja odredaba ove odluke koje su uređene Zakonom o veterinarstvu i Zakonom o zaštiti i dobrobiti životinja.
- (7) Za provođenje ove odluke nadležni su: Komunalni inspektor i Komunalni redar, Služba za civilnu zaštitu i zaštitu od požara i JKP "RAD" d.o.o. Ključ.

## IX - KAZNE NE ODREDBE

### Član 26.

- (1) Novčanom kaznom od 1.000,00 – 4.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana: 4, 5, 6, 7. i 8. stav 1 ove Odluke.



(2) Novčanom kaznom od 200,00 – 800,00 KM, za prekršaje iz ovog člana kaznit će se i odgovorno lice u pravnom licu.

#### **Član 27.**

Novčanom kaznom od 200,00 – 1.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana: 11. stav 1, 3 i 4. i člana 13. stav 1 i član 14. Novčanom kaznom od 40,00 – 200,00 KM, za prekršaje iz ovog član kaznit će se i odgovorno lice u pravnom licu.

#### **Član 28.**

Novčanom kaznom od 500,00 – 1.500,00 KM, kaznit će se za prekršaj obrtnik ako postupi protivno ili se ne pridržava odredaba iz člana: 5, 6, 7. i 8. stav 1 ove Odluke. Novčanom kaznom od 100,00 – 300,00 KM, kaznit će se za prekršaj obrtnik ako postupi protivno ili se ne pridržava odredaba iz člana: 11. stav 1, 3 i 4. i člana 13. stav 1 i član 14.

#### **Član 29.**

Novčanom kaznom od 300,00 – 1.000,00 KM, kaznit će se za prekršaj fizičko lice ako postupi protivno ili se ne pridržava odredaba iz člana: 5, 6, 7, 8. stav 1 i članova 23 i 24 ove Odluke. Novčanom kaznom od 40,00 – 200,00 KM, kaznit će se za prekršaj fizičko lice ako postupi protivno ili se ne pridržava odredaba iz člana: 11. stav 1, 3 i 4. i člana 13. stav 1 i član 14.

#### **Član 30.**

(1) Novčanom kaznom od 20,00 – 4.000,00 KM, kaznit će se za prekršaj fizičko lice, ako postupi protivno ili se ne pridržava odredaba iz člana 22.

(2) Novčanom kaznom od 500,00 – 7.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana 22 i 23 ove Odluke.

(3) Novčanom kaznom od 50,00 – 2.000,00 KM, kaznit će se za prekršaj odgovorno lice u pravnom licu, ako postupi protivno ili se ne pridržava odredaba iz člana 22 ove Odluke.

(4) Komunalni inspektor je obavezan da izda prekršajni nalog u slučaju kršenja odredaba ove Odluke.

(5) Novčane kazne po izdatim prekršajnim nalogima su prihodi budžeta općine Ključ

### **X - PRIJELAZNE I ZAVRŠNE ODREDBE**

#### **Član 31.**

Ova Odluka stupa na snagu osmog dana od dana od dana objavljivanja u "Službenom glasniku općine Ključ".

Broj: 05-02-\_\_\_\_\_/18

Datum. \_\_\_\_\_ 2018. godine

PREDSJEDAVAJUĆI  
OPĆINSKOG VIJEĆA

Adem Crnalić, ekonomist

**O B R A Z L O Ž E N J E**  
**uz Odluku o držanju i zaštiti domaćih životinja, kućnih ljubimaca**  
**i nezbrinutih životinja na području općine Ključ**

**PRAVNI OSNOV**

Članom 12., odnosno 21. Zakona o lokalnoj samoupravi USK („Službeni glasnik USK“, broj: 8/11) te članom 23. Statuta općine Ključ - Prečišćeni tekst („Službeni glasnik općine Ključ“, br.3/10 i 3/11) propisane su nadležnosti jedinice lokalne samouprave, odnosno općinskog vijeća.

Na osnovu Zaključka Općinskog vijeća općine Ključ broj: 05-02-1655/18 od 04.06.2018. godine održana je centralna javna rasprava o Nacrtu Odluk o držanju i zaštiti domaćih životinja, kućnih ljubimaca i nezbrinutih životinja na području općine Ključ u sali Općinskog vijeća 19.09.2018. godine. O provedenoj javnoj raspravi sačinjen je pisani izvještaj koji je sastavni dio ovog prijedloga Odluke.

Prema tome, pravni osnov je sadržan u citiranim zakonskim, odnosno podzakonskim odredbama, pa u tom smislu, ne postoje pravne smetnje za donošenje ove Odluke.

**RAZLOZI ZA DONOŠENJE**

Ovom Odlukom se propisuju uslovi, način držanja i postupanja sa kućnim ljubimcima i nezbrinutim životinjama, a naročito kretanje pasa u javnim objektima i na javnim površinama, način postupanja sa izgubljenim i napuštenim životinjama, psima i mačkama lualicama i životinjama opasnim za okolinu na području općine Ključ, nadzor i kaznene odredbe.

Već nekoliko godina prisutnost pasa lualica na ulicama i javnim površinama predstavlja veliki problem. Psi lualice stvaraju probleme ne samo zbog svoje agresivnosti, već i sve većeg razmnožavanja, ali i zbog migracije pasa iz jedne općine u drugu. Ozbiljno se ugrožava sigurnost građana, a naročito djece. Pored ugriza i straha koji izazivaju kod građana, te pričinjavanja materijalne štete građanima, napadi pasa lualica mogu imati dalekosežne i trajne posljedice na zdravlje ljudi, a naročito kada je u pitanju psihofizičko zdravlje djece. Također, prisustvo velikog broja pasa lualica uzrokuje znatno onečišćenje okoline odnosno javnih površina, parkova i gradskih ulica. Napuštene životinje mogu biti i prijenosnici zaraza na ljude i druge životinje. Zbog svakodnevnih napada i ugriza pasa lualica, građani se sve češće odlučuju na tužbe, a sudovi uglavnom donose presude u njihovu korist. Psi se ne uklanjaju sa ulica još od 2009. godine kada je usvojen Zakon o zaštiti i dobrobiti životinja koji zabranjuje hvatanje i ubijanje pasa, a lokalnim vlastima nameće obavezu gradnje azila za napuštene životinje.

Na području općine Ključ do danas nije osnovan higijenski servis i sklonište za životinje, a čija izgradnja i funkcionisanje iziskuju značajna finansijska sredstva. U rješavanju problematike pasa lualica do sada su redovno izdvajana sredstva za obavljanje kafilerijskih usluga, odnosno za sterilizaciju i kastraciju pasa, kako bi se stabilizirao broj pasa lualica na području općine, a što se pokazalo nedovoljno učinkovitim metodom, jer psi nisu uklonjeni sa ulica i dalje predstavljaju prijetnju građanima. Sterilizacija pasa je ključni preventivni korak u kontroliranju populacije pasa lualica, ali je samo dio rješenja.

Da bi se ovaj problem sistemski rješavao, te eliminirali uzroci koji dovode do pojavljivanja brojnih pasa na javnim površinama, predlažemo donošenje Odluke o uslovima i načinu držanja pasa, te načinu postupanja sa napuštenim i izgubljenim psima na području općine Ključ.

**FINANSIJSKA SREDSTVA**

Za provođenje ove Odluke potrebno je osigurati sredstva iz Budžeta općine Ključ za 2019. godinu (finansiranje rada skloništa za životinje i higijenskog servisa i dr.).

Na osnovu svega naprijed izloženog predlaže se Općinskom vijeću općine Ključ da donese predloženu Odluku.

Ključ, oktobar 2018. godine

**O B R A D I V A Ć**

**Služba za razvoj, privredu i zajedničke poslove**

**P R E D L A G A Ć**  
**OPĆINSKI NAČELNIK**  
**Nedžad Zukanović, prof.**